



Fernand ETGEN
President vun der
Deputéierte Chamber
19, um Krautmaart
L-1728 Lëtzebuerg

Lëtzebuerg, den 21/09/2020

Här President,

Sou wéi den Artikel 83 vun eisem Chambersreglement et virgesäit, bieden ech Iech, dës parlamentaresch Fro un d'Ministère fir Mobilitéit & Bildung weiderzeleeden.

An der Kommissiounssëtzung zur Santé vum 21.09.2020, wou et ëm d'Konditiounen fir eng *mise en quarantaine* gaangen ass, huet den Direkter vun der Santé erkläert, dass Schüler, déi ënnert Quarantän stinn an awer nach an den Unterrecht dierfen, net sollen den ëffentlechen Transport benotzen.

Vill Elteren hunn awer net d'Méiglechkeet, fir hiert d'Kand op anerem Wee an d'Schoul ze bréngen.

An deem Zesammenhang wéilt ech de Ministeren dës Froe stellen:

1. Wat recommandéiert de Ministère den Elteren vun engem Kand, dat a Quarantän ass an awer nach an d'Schoul muss goen, a punkto Schoultransport? Wéi sollen d'Léit d'Kand an d'Schoul bréngen, wann net iwwert den ëffentlechen Transport?
2. Proposéiert de Ministère, am Fall wou d'Elteren net iwwert een eegenen Auto verfügen oder aus beruffleche Grënn hier Kanner net féiere kënnen, eng speziell Transport-Méiglechkeet fir dës Kanner?
3. Falls de Ministère keng Alternativ proposéiert: Dierfe Kanner, déi net ouni den ëffentlechen Transport an d'Schoul kommen, an esou engem Fall doheem bliwen?

Mat déiwem Respekt,

CLEMENT Sven
Député



Gemeinsam Äntwert vum Minister fir Educatioun, Kanner a Jugend, vum Minister fir Mobilitéit an ëffentlech Aarbechten a vun der Gesondheetsministesch op d'parlamentaresch Fro Nr. 2870 vum honorabelen Här Deputéierte Sven Clement

De Schülertransport ass zanter der Schoulrentrée ee Sujet, iwwer dee vill diskutéiert gouf an d'Organisatioun ass ee reellen Defi an Zäite vu Pandemie. Et ass ee wichtige Pilier vun der Schoulorganisatioun an een efficacë Schoultransport ass essentiell fir de Fonctionnement vun de Schoulen, gläichzäiteg muss awer dofir gesuergt ginn, datt déi sanitär Moossnamen agehal ginn.

Den Transportministère an den Educatiounsministère hunn an deem Sënn decidéiert, fir de Schoultransport ze verstärken, engersäits, wat d'Zuel vun de Faarten ugeet an anerersäits, wat d'Personal ugeet.

Eng Evaluatioun um Terrain huet erginn, datt op ronn 10 % vun de Faarten, nämlech op 37, Schüler hu misse stoen. Dofir fueren d'Bussen zanter dem 9. November méi dacks oder et gi méi grouss Bussen agesat.

Wat d'Froe vum honorabelen Deputéierten zu Schüler an der Quarantaine ugeet, ass et esou, datt ee Schüler, deen eng Ordonnance de mise en quarantaine (am Kader vun engem Zenario 2 oder 3) vun der Santé kritt, muss doheem bleiwen an um Enseignement à distance deel huelen, bis en negativen Test virläit. Déi betraffe Schüler sinn deementspreechend net op den ëffentleche Schoultransport ugewisen.

Schüler, déi am Zenario 1 aus dem Stufemodell vum sanitäre Konzept vun der Éducation nationale sinn, gi weider an d'Schoul. Dobäi handelt et sech ëm Schüler aus enger Klass, wou ee Matschüler positiv getest ginn ass, mee wou d'Infektiounsquell mat grousser Warscheinlechkeet ausserhalb vun der Schoul läit. D'Direction de la Santé gëtt an deem Fall eng Rei vu Recommandatiounen eraus. Generell sollen déi betraffe Persounen hir sozial Kontakter reduzéieren. Dozou gehéiert, datt si wa méiglech net an d'Maison relais an an de Schoulrestaurant ginn, oder de Schoultransport notzen.

Dobäi handelt et sech ëm eng Recommandatioun, déi d'Elteren oder d'Schüler no hire Méiglechkeete sollten befollegen. Wann dëst net méiglech ass, sollen si awer och weiderhi vun dëse Méiglechkeete profitéiere kënnen. D'Notzung vum Schoultransport geschitt da wéi gewinnt, am Respekt vun de Gestes barrières.

Fir d'Schüler am Schoultransport an am ëffentlechen Transport gëllen d'Consignen aus de Circulären, déi dem Schoulpersonal am Virfeld vun der Rentrée zoukomme gelooss goufen an um Internetsite vu mengem Ministère ëffentlech zougänglech sinn.

Aus dëse Circulairë geet ervir, datt all Kand iwwert 6 Joer am ëffentlechen Transport an um Trajet tëscht doheem an der Schoul eng Mask muss unhunn.

Vu datt d'Organisatioun vum Schoultransport am Enseignement fondamental an de Gemengen hir Attributioun fält, steet et de Gemenge fräi, no enger Evaluatioun vun de lokale Gegebenheete weider Preventiounsmesuren ze decidéieren.

A kengem vun den dräi Zenarien ass d'Kand vum Unterrecht befreit an ënnerläit weiderhin der Schoulpflicht.